

de François que i'attendois, & qu'il falloit nourrir iufques à ce que nous fuffions tous affemblez, & que nostre cabane fust faite. Vous pouuez vous loger où vous voulez, car ceste Nation entre toutes les autres, est fort hospitaliere enuers toute forte [141] de perfonnes, mefmes enuers les Estrangers: & vous y demeurez tant qu'il vous plaist, tousiours bien traité à la façon du pays, & au partir de là vous en voyla quitte pour vn, *ho, ho, ho, outoécti*, ou vn grand mercy, au moins par entre-eux. Car des François ils attendent quelque recompense, à discretion toutesfois. Il est bien vray que tous ne font pas également hospitaliers, il y a du plus & du moins. Mon hoste est des premiers en ceste vertu, & peut-estre est-ce pour ce fujet que Dieu l'a cõblé iufques à present de benedictiõs temporelles, & l'a preferué entre tous fes Concitoyens. Car leur village nommé *Teandeouihata*, ayant esté bruslé par deux fois, il n'y a eu en toutes les deux fois, que fa feule maifon exempte de l'embracement. Quelques vns attribuent cela au fort; pour moy ie le rapporte à vne [142] caufe plus noble; & si ie me fouuiens d'vn bon trait, soit de prudence, soit d'humanité, dont il se feruit au premier embracement; car l'enuie s'estant allumée contre luy, & quelques-vns voulant perdre fa cabane, que le feu auoit espargnée, auffi tost il fait mettre chaudiere haute, appreste vn bon festin, conuie tout le village, & les ayant affemblez, leur fait ceste harangue. Mes freres, i'ay vn tres-sensible déplaisir de l'accident qui est arriué; mais qu'y ferions nous, c'en est fait. Pour moy ie ne sçay pas ce que i'ay fait au Ciel, pour auoir esté espargné entre tous les autres. Or pour vous tefmoigner mon déplaisir, & le desir que i'ay de